

TEKS UCAPAN  
BRIGIDIER JENERAL DATO' PROF. DR. KAMARUDIN HUSSIN  
NAIB CANSELOR UniMAP  
SEMPENA  
PROGRAM ISLAM HADHARI - PEMERKASAAN PENDIDIKAN  
PELAJAR CEMERLANG NEGERI PERLIS  
PADA 17 FEBRUARI 2009  
DI DEWAN 2020 KANGAR, PERLIS

Bismillahirrahmanirrahim.

Assalamualaikum Warahmatullahi Wabarakatuh

**Yang Amat Berhormat Dato' Seri Dr. Md. Isa Sabu, Menteri Besar  
Perlis.**

**Yang Berhormat Dato' Seri Mohamed khaled Nordin, Menteri  
Pengajian Tinggi Malaysia.**

**Yang Berhormat Dato' Yaziz Mat, Speaker Dewan Undangan  
Negeri Perlis.**

**Yang Berhormat Tuan Mohamad Zabidi Zainal , Setiausaha  
Kerajaan Negeri Perlis.**

**Yang Berhormat Tuan Abdul Rasid Sudin, Penasihat Undang-  
Undang Negeri Perlis, merangkap Ahli Lembaga Pengarah  
Universiti.**

**Yang berhormat Dato' Haji Musa Hassan, Pegawai Kewangan  
Negeri Perlis.**

**Ahli – ahli Majlis Mesyuarat Kerajaan Negeri.**

**Ahli – ahli Yang Berhormat.**

**Dif – dif kehormat.**

**Pegawai-pegawai utama Universiti Malaysia Perlis**

**Dekan-dekan dan Ketua – ketua Jabatan UniMAP, Wakil-wakil  
media, seterusnya para hadirin yang dihormati sekalian.**

Alhamdulillah, bersyukur kita ke hadhrat Allah SWT kerana dengan izin dan inayahnya kita diberikan kesempatan dan peluang oleh Allah untuk menyedut udara yang nyaman dan segar di bumi yang merdeka dan paling penting, aman tanpa konflik peperangan yang boleh menimbulkan kekusutan kepada rakyat.

Sewajarnya kita menggunakan kesempatan dan peluang yang diberikan Allah ini untuk terus mempertahankan negara yang kita cintai ini dari serangan mahupun hendapan penjajah.

Ingatlah, sesungguhnya dugaan datang dalam pelbagai cara dan kita yang hidup dalam keadaan aman, jangan mudah leka dengan kesenangan yang dinikmati hari ini. Justeru, sentiasa beringat dan berwaspada akan menjadikan kita lebih bersedia dalam menghadapi cabaran dalam hidup.

Hadirin sekalian

Aspek pendidikan diakui sangat penting dalam menyediakan negara dengan modal insan berkualiti yang memiliki sahsiah, berkemahiran tinggi serta mampu berfikir secara kreatif dan kritis khususnya untuk mengisi ruang pemodenan menuju wawasan 2020.

Pendidikan juga dilihat sebagai teras kecemerlangan dan kegemilangan sesebuah ummat dan dalam usaha kita

memartabatkan sesebuah bangsa, aspek ekonomi, pendidikan dan sosial haruslah direalisasikan dengan perkembangan dunia.

Maka, tidak hairanlah, cabaran pembinaan modal insan ini terletak sebahagian besarnya di bahu pendidik terutama di peringkat sekolah dan kepada merekalah kita sandarkan harapan yang menggunung tinggi untuk mengembangkan potensi, bakat dan kualiti seseorang murid atau pelajar.

Namun, hakikat sebenarnya, tidak semua beban harus dipikul oleh warga pendidik. Sebagai sebuah gedung Ilmu pengetahuan yang mempunyai ramai tenaga pakar baik dalam apa bidang sekali pun, universiti awam mahupun swasta di negara ini harus mengambil inisiatif untuk memajukan pelajar terutama di peringkat sekolah menengah.

Mentaliti jumud bahawa alam persekolahan adalah alam “berbulan madu” terutama bagi pelajar-pelajar yang tidak terlibat dengan peperiksaan besar harus di ubah dan sebaliknya mereka harus didedahkan sedari awal persekolahan lagi tentang betapa pentingnya pendidikan sebagai jaminan kegemilangan hidup di masa hadapan.

Hadirin sekalian,

Menyedari akan kepentingan inilah, kami di Universiti Malaysia Perlis, selaku universiti berteraskan kejuruteraan dengan kerjasama Majlis Guru-guru Cemerlang Malaysia, mengambil inisiatif untuk

Merealisasikan Program Pemerksaan Pendidikan Pelajar Cemerlang Negeri Perlis khusus untuk membantu kecemerlangan pendidikan pelajar dari 25 buah sekolah di seluruh negeri Perlis.

Saya percaya, program ini mampu memberikan impak yang besar kepada sistem pendidikan di Malaysia apatah lagi guru-guru sekolah yang terlibat merupakan “Tenaga Pakar” dalam bidang pendidikan masing-masing.

Selain itu, ia juga sebagai mendokong hasrat Kementerian Pengajian Tinggi yang mahukan IPT turut menyalurkan kepakaran masing-masing ke arah memperkasakan komuniti masyarakat di kawasan masing-masing atau dalam erti kata lain memperkasakan modal insan.

Melalui program ini, seramai 258 pelajar atau ``modal insan`` yang bakal menduduki Peperiksaan Penilaian Menengah Rendah (PMR) terpilih akan dibimbing oleh mentor (dalam konteks ini Sahabat IPT) baik dari aspek pendidikan dan kebajikan bagi memastikan mereka terus mengekalkan potensi kecemerlangan yang telah sedia ada dalam diri masing-masing.

Bagi memastikan kejayaan dan kelangsungan program ini, satu modul aktiviti juga akan dibangunkan oleh UniMAP dan MGC cawangan Perlis dengan penekanan diberikan kepada mata pelajaran Matematik dan Bahasa Inggeris mengikut kurikulum dan format peperiksaan yang sebenarnya.

Bagaimanapun, sebelum memperkasakan pendidikan dikalangan pelajar sekolah, UniMAP terlebih dahulu akan menerapkan cabang ilmu yang perlu ditekankan dikalangan Sahabat IPT yakni pelajar-

pelajar UniMAP yang akan bertindak sebagai perantara atau mentor kepada anak-anak yang terpilih ini.

Manakala guru-guru cemerlang pula akan memberi panduan dan bimbingan termasuk teknik pembelajaran terbaik yang akan digunapakai oleh setiap mentor mahupun pelajar bagi memastikan setiap ilmu yang diturunkan itu mencapai matlamat dan sasaran yang ditetapkan.

Tidak salah untuk saya menyatakan, semua guru yang terlibat mempunyai pengalaman yang luas dalam bidang pendidikan serta turut terlibat dalam proses penggubalan soalan-soalan peperiksaan.

Maka sewajarnya, anda pelajar-pelajar terpilih ini harus merasa bangga kerana bakal mendapat ilmu dan teknik pembelajaran daripada mereka yang pakar dan bertauliah.

Hadirin sekalian,

Jika masih ada yang kabur atau tidak jelas tentang pelaksanaan program ini, izinkan saya untuk menghuraikan dalam konteks yang lebih mudah dan ringkas.

258 pelajar terpilih ini akan diasah minda dan akal untuk mempertajamkan ilmu dalam bidang Matematik dan Bahasa Inggeris selain dipantau prestasi akademik sehinggalah masing-masing selesai menduduki PMR pada penghujung tahun ini.

Proses pendidikan dan pemerksaan pelajar-pelajar ini tidak terhenti di sini, sebaliknya mereka akan terus dibimbing, dinilai dan dijaga sewaktu di Tingkatan Empat, Lima seterusnya sehinggalah masing-masing selesai menduduki Peperiksaan Sijil Pelajaran Malaysia (SPM).

Dan proses ini akan berterusan sehingga kumpulan pelajar terpilih ini berjaya melanjutkan pengajian ke menara gading dengan diberikan bantuan yang sewajarnya sewaktu pengajian Ijazah Tinggi sebelum keluar dengan segulung ijazah.

Sejujurnya saya sebagai Naib Canselor UniMAP sangat berharap dengan program yang kita anjurkan ini akan turut memberi impak besar kepada UniMAP.

Sebagai universiti kejuruteraan dan perintis kepada program ini, kejayaan anak-anak ini semasa SPM nanti akan menjadi pengukur kejayaan program ini. Dan saya kira ada anak-anak yang dihadapan saya ini akan menjadi kebanggaan UniMAP kerana mereka adalah pelajar-pelajar yang berjaya dalam SPM dan dan mungkin bakal memilih UniMAP sebagai tempat untuk mendapat segulung ijazah.

Hadirin sekalian,

Matlamat kami cuma satu, untuk merealisasikan konsep 1 Rumah 1 Profesional di kalangan warga Perlis dengan harapan ia mampu

membawa perubahan taraf ekonomi seterusnya memastikan Perlis muncul sebagai antara negeri Maju di Malaysia.

Saya rasa tidak mustahil hasrat ini akan tercapai. Tidak sukar untuk mewujudkan seorang Peguam, Doktor, Jurutera, Arkitek, Ketua Pegawai Eksekutif di syarikat Multinasional atau mungkin Duta Besar negara ke negara-negara luar malah mungkin juga seorang Perdana Menteri kelahiran Perlis sekiranya program ini dijayakan dengan sepenuh hati.

Ini kerana, kumpulan pelajar ini telah dikenalpasti sejak umur muda, diberi bimbingan dan panduan mengenai hala tuju pendidikan masing-masing selain penekanan turut diberikan berhubung pentingnya seseorang pelajar mempunyai kerjaya yang cemerlang sebagai jaminan masa depan yang gemilang.

Anak-anak inilah yang bakal mengemudi tonggak pemerintahan negara, dan mereka jugalah yang bakal berdepan dengan pelbagai cabaran baik dari dalam negara mahupun dari negara-negara luar.



Justeru, sewajarnya, kumpulan anak-anak cemerlang ini diasuh minda dan pemikiran mereka untuk menjadi yang cemerlang dikalangan yang cemerlang seterusnya menjadi warga Malaysia yang dihormati suatu masa nanti.

Secara ringkasnya, izinkan saya menyimpulkan harapan kami hasil dari pelancaran program ini. Ibarat sebatang pohon, apabila

mudanya itu banyaklah dahannya tumbuh dan cabangnya boleh panjang, dan maka apabila tua kelak banyaklah buahnya. Maka demikianlah hal manusia ini pun.

Semoga benih yang kami semai pada hari ini mampu membuahkan kejayaan yang cemerlang, gemilang dan terbilang dalam tempoh sekurang-kurangnya 10 tahun lagi sekaligus membantu menjayakan hasrat Wawasan 2020 melalui penghasilan lebih ramai tenaga profesional.

Hadirin sekalian,

Pada hari ini juga, kita juga akan menyaksikan masing-masing satu majlis Menandatangani Memorandum Persefahaman dan Memorandum Perjanjian antara UniMAP dan Majlis Guru Cemerlang Malaysia serta UniMAP dan Kolej INTIM.

Kedua-dua memorandum ini bakal membuka jalan baru untuk UniMAP terus unggul di persada pendidikan tinggi negara sekaligus

melahirkan graduan yang bersahsiah tinggi, berketrampilan seterusnya mampu menjadi insan terbilang dan gemilang.

Semoga, selepas ini, lebih banyak jalan terbuka untuk UniMAP menabur bakti ke arah membangunkan kegemilangan pendidikan sehingga ke peringkat Antarabangsa. Insya-Allah.

Sebelum mengakhiri ucapan pada pagi ini, saya ingin merakamkan jutaan terima kasih kepada YB Menteri Pengajian Tinggi, YAB Menteri Besar Perlis, Barisan Exco-Exco Kerajaan Negeri dan semua tetamu Kehormat yang sudi hadir dan menyaksikan Pelancaran Program Pemerkasaan Pendidikan Islam Hadhari Peringkat Negeri Perlis ini.

Jutaan terima kasih juga kepada seluruh kepimpinan kerajaan negeri yang memberi kepercayaan penuh dan menyokong penganjuran program seperti ini di negeri Perlis.

Semoga, kerjasama antara kita semua ini akan menguntumkan kejayaan yang diharapkan.

Sebelum mengakhiri ucapan pada kali ini, izinkan saya menyampaikan dua rangkap pantun untuk renungan kita bersama :

**Raja beradu lewat ke Maghrib  
Membakar dupa ditengah laman  
Menuntut ilmu perkara wajib  
Sebagai hamba pelengkap iman**

---

**Buah labu didalam peti  
Buat titi batang rumbia  
Dengan ilmu kita berbakti  
Sampai mati dipandang mulia**

Sekian, Wassalamualaikum Warahmatullahi Wabarakatuh.